

KOMMUNEQARFIK SERMERSUUMI INERSIMASUT PILLUGIT ISUMAGINNINNERMI SULIANI ATAQATIGIISSAARINERMUT SULEQATIGIISSITAMUT ILEQQOREQQUSAT

Oqartussaasoqarfiit assigiinngitsunik suliallit isumaginninnermi suliassat pillugit suleqatigiinnissaannut inatsisartut peqqussutaat nr. 14, 1. november 1982-meersoq naapertorlugu Kommuneqarfik Sermersuumi oqartussaasoqarfiit assigiinngitsunik suliallit isumaginninnermi suliassat pillugit suleqatigiinnissaannut ileqqoreqqusami malittarisassat aalajangersarneqarput.

§ 1 Inersimasunut Ataqatigiissaarinermut Suleqatigiissitamik (I AS) pilersitsisoqassaaq.

I AS sapinngisamik imatut katitigaassaaq:

- Ilaasortat sisamat Isumaginninnermut Suliffeqarnermullu Ingerlatsivimmeersut
 - o Ikinnerpaamik fagchef ataaseq (atuuffik) – akisussaasuusoq
 - o Suliffeqarnermut tunngasunit ikinnerpaamik ataaseq
 - o Timimik sungiusaasunut / pillorissaasunut aqutsisoq
- Peqqinnissaqarfimmit ilaasortaq ataaseq
- Meeqqanut Ilaqutariinnullu Ingerlatsivimmiit ilaasortaq ataaseq, pisariaqartitsisoqartillugu

Suleqatigiissitap siunertarai:

- a) inunnut ataasiakkaanut immikkoortunulluunniit naleqqiullugu suliniutit oqartussat assigiinngitsut neqeroorutaat sapinngisamik pitsaanerpaamik ataqatigiissarnissaat qulakkiissallugu
- b) inunnut ataasiakkaanut aamma innuttaasut pitsaanerpaamik sullinneqarnerinut isumagineqarnerinullu pingaaruteqartunik pissutsinik allanik paasissutissanik paarlaasseqatigiinneq
- c) immikkut ilisimasaqarnerup, nunaqqatigiinni pigineqartup sapinngisamik illugiimmik iluaqutigineqarnissaa qulakkiissallugu
- d) Isumaginninnermut Suliffeqarnermullu Ataatsimiititamut najoqqutassanik inassuteqarluni oqaaseqaateqartarnerit.

Imm 2 Suleqatigiissitap ingerlatsinermini pisortat peqataasut aalajangiisinnaassusiannut malinnittussaavoq.

Imm 3 Fagcheffi suleqatigiissitap ataatsimiinnerani aqutsisuuvoq. Taanna peqartinnagu Fagchefip taartaa ataatsimiinnermi aqutsisuussaaq.

Imm 4 Oqartussanit peqataasunit suleqatigiissitami ilaasortat amerlassusaat ukiut tamaasa aggustip aallaqqaataani iluarsineqarsinnaapput imm. 1 eqqarsaatigalugu. Tamanna pillugu suleqatigiissitap nammineq aalajangiisassaaq.

§2 Ataatsimiinnissaq sioqqullugu allagaatinik suleqatigiissitamut nassiussuinissaq, kiisalu ataatsimiinnernit imaqarniliornissaq siunertaralugu suleqatigiissitamut

nassiussuisoqarnissaa allatseqarnikkut Isumaginninnermut Suliffeqarnermullu Ingerlatsivik ikiutissaaq.

Imm. 2 Ataatsimiittoqannginnerani oqaluuserisassat suliarineqartassapput. Suleqatigiissitami ilaasortat ataasiakkaat suliap ataatsip oqaluuserisassanut ilanngunneqarnissaa piumasarisinnaavaat. Ullormut oqaluuserisassat sapinngisamik ataatsimiinnissaq ullut suliffiusut pingasut sioqqullugit ilaasortanut tamanut nassiussuunneqassapput.

Imm 3 Imaqarniliat allanneqassapput suliallu ataasiakkaat suliarineqartunut tunngatillugu inerniliinernik naatsunik imaqassallutik.

Imm 4 Suleqatigiissitap piffissami sumilu ataatsimiinnissaa nammineq aalajangersassavaa, taamaattorli qaammammut ikinnerpaamik ataasiarluni ataatsimiittoqartassalluni. Allatigut pisariaqartitsineq naapertorlugu qanorluunniit akulikitsigisunik ataatsimiittoqarsinnaavoq. Nalinginnaasumik ataatsimiinnissamut takussutissaq ukiut affakkaarlugit allatseqarfimmit nassiunneqartassaaq.

§3 Suliap ataatsip arlallilluunniit suliarineqarnerani Politiiniit, Pinerluttulerinermik Isumaginnittoqarfimmit, perorsaasunit kiisalu peqqinnissaqarfimmit sulisut suleqatigiissitap ataatsimiiniissaanut peqataaqqullugit aggersarneqarsinnaapput.

Imm. 2 Suleqatigiissitami ilaasortat ataasiakkaat tamarmik suleqatigiissitap ataatsimiinnissaanut, suliap ataatsip arlallilluunniit suliarineqarnerani nammineq ingerlatsivigisamiit/suliffeqarfigisamiit sulisumik pineqartup immikkut ilisimasaqarfigisaanik aggersaasinnaapput.

Imm. 3 Immikkut pisoqartillugu, suliap ataatsip suliarineranut pingaaruteqartutut tamanna nalilerneqarpat, sulisitsisuniit sulisartuniillu sinniisunik imaluunniit suliffeqarfiit ataasiakkaat sinniisuinik aamma aggersaasoqarsinnaavoq. Taamatut pisoqartillugu pisortat ingerlatsiviini sulianik suliarinninneq pillugu Inatsisartut inatsisaat nr. 8, 13. juni 1994-imeersumi § 27, imm. 3 malillugu sinniisut aggersarneqartut nipangiussisussaanerat nakkutigineqassaaq.

Imm. 4. Ukiumut ataqatigiissaarinnermut ataatsimiititami ataatsimiittoqartassaaq, tassani sammisat nalinginnaasut qaqinneqartarlutik. Ataatsimiinnerni taakkunani siumoortumik saqqummiussassat nassiunneqareernerisigut ingerlatsivinni/suliffeqarfinni attuumassuteqartunit pisortat suliatigullu suliaqartut aggersarneqarsinnaapput.

Imm. 5. Suleqatigiissitap Isumaginninnermut Suliffeqarnermullu Ataatsimiititaq pisariaqartitsineq naapertorlugu I AS-imi sulineq pillugu ilisimatitsissuteqarfigisassavaa, taamaattorli ukiumut ataasiarluni.

§4 Suleqatigiissitami ilaasortat tamarmik aallaaviatigut Nuummi inissisimassapput.

Imm. 2. Suliamik naliliineq aallaavigalugu pisariaqartitsineq naapertorlugu kommunimi illoqarfinni allani suleqatigiissitamik pilersitsisoqarsinnaavoq. Fagchefi taassumaluunniit taartaa ataatsimiinnermi aqutsisutut peqataassaaq, imm. 4 naapertorlugu. Illoqarfinni allani suleqatigiissitaliortoqassappat, taakku ileqqoreqqusaq una malissavaat.

Imm. 3. Suleqatigiissitami ilaasortaq ataaseq ataatsimiinnermi peqataasinnaangikkuni pineqartup nammineq ingerlatsivianiit/suliffianiit sinniisumik ataatsimiinnermi peqataasoqarnissaa pisussaaffigaa imaluunniit peqataasinnaanani nalunaaruteqarluni. Tamanna piaarnerpaamik Isumaginninnermut Suliffeqarnermullu Ingerlatsiviup allatseqarfianut nalunaarutigineqassaaq.

Imm. 4. Ataatsimiinnermi nalunaarasuartaatikku atortorissaarutit atorpeqarsinnaapput.

§5 Ataatsimiititami ilaasortat kiisalu ataatsimiititap ataatsimiinnerani peqataasut allat inuit ataasiakkaat atugaannut tunngasunik ilisimalikkat eqqarsaatigalugit nipangiussisusaatitaapput.

Imm. 2. Nipangiussisusaatitaanerli paasissutissat attuumassuteqartut piviusorsioortut peqataasut nammineq ataatsimiititami ilaasortat ingerlatsiviinut ingerlatseqqinnissaannut akornutaassanngilaq.

Imm. 3. Nipangiussisusaatitaanermik unioqquitsineq Kalaallit Nunaanni Pinerluttulerinermik inatsimmi qaqugukkulluunniit atuuttumut ilaavoq.

Kommuneqarfik Sermersuumi Kommunalbestyrelsimit akuersissutigineqarput

Ulloq: _____

Borgmesteri
Asii Chemnitz Narup

Kommunaldirektøri
Lars Møller-Sørensen

Kommuneqarfik Sermerseuumi inersimasut pillugit isumaginninnermi suliani ataqatigiissaarinnermut suleqatigiissitamut ileqqoreqqusaq qulaani pineqartoq juunip 12-ni 2012-meersoq akuersissutigineqarpoq

Ulloq: _____

Peqqissutsimut, Isumaginninnermut Inatsisinillu
Atuutsitsinnermut Naalakkersuisoq
Martha Abelsen